

МОЛИТВА В ДЕНЬ ПОБЕДЫ

Боже Великий и Непостижимый, спасаяя
погибающия, животворяя мертвыя,/ вся творяя по воли
Твоей, и дивным Твоим промыслом управляя всяческая!/
Приклони ухо Твое с высоты святая Твоея и прими от
нас, смиренных и недостойных рабов Твоих,/ сердцем и
усты возносимая Тебе благодарственная сия моления,
исповедания и славословия.

Яко не по беззаконием нашим сотворил еси нам,
Господи, ниже по грехом нашим воздал еси нам./ Ты
глаголал еси древле сыновом Израилевым, яко, аще не
послушают гласа Твоего хранити и творити вся заповеди
Твоя,/ наведеши на них язык безстуден лицом, иже
сокрушит их во градех их, дондеже разорятся стены их./ И
мы ведехом, яко исполнился глагол сей страшный на
народе нашем./

Но Ты, Господи Боже, Щедрый и Милостивый,
Долготерпеливый и Истинный/ и правду храняй и творяй
милость, милостию великою помиловал еси/ и, посетив
жезлом неправды наша, ущедрил еси нас победою на
сопостаты./ Темже утвердися сердце наше в Господе
нашем,/ вознесся рог наш в Бозе нашем, возвеселихомся о
спасении Твоем./ Благодарим Тя за избавление Отечества
от врага лютаго./ Дажь нам, Господи, память сего
славнаго Твоего посещения/ твердо и непрестанно имети в
себе,/ еже всегда благодарити и славословити:/ слава Тебе,
Богу, Благодетелю нашему, во веки веков.